


Ni Pangulong  
Thomas S. Monson



# Ang Panawagan sang Manluluwas nga Mag-alagad

**A**ng tanan nga nakatuon sang mathematics nakahibalo kon ano ang common denominator. Para sa mga Santos sa Ulihing mga Adlaw, may yara sang common denominator ukon pareho nga kahimtangan nga nagabugkos sa aton. Ina nga common denominator amo ang indibidwal nga panawagan nga ginabaton sang kada isa sa aton sa pagtuman sang mga takay sa ginharian sang Dios diri sa duta.

Nagakumodkumod ka bala kon may tawag nga na-gaabot sa imo? Ukon ginabaton mo nga may pagpasalamat ang tagsa ka oportunidad sa pag-alagad sa imo mga kauturan, nga nakahibalo nga ang aton Amay nga Langitnon magabugay sa ila nga Iya ginatawag?

Ginalauman ko nga indi madula sa aton ang matudtuod nga katuyuan sang aton importante nga mga oportunidad sa pag-alagad. Inang katuyuan, inang wala'y katupusan nga lalab-uton, ang amo man nga gin-siling sang Ginuo kag makita sa Pearl of Great Price. “Kay yari karon, amo ini ang akon buluhaton kag ang akon himaya—ang magpahanabo sang imortalidad kag wala'y katupusan nga kabuhi sang tawo.”<sup>1</sup>

Kabay nga padayon naton nga dumdumon nga ang kunop sang pagkamiyembro sa Ang Simbahan ni Jesucristo sang mga Santos sa Ulihing mga Adlaw indi

isa ka kunop sang kasulhay kundi sina sang responsibilidad. Ang aton tulumanon, dugang sa pagluwas sang aton kaugalingon, amo ang paggiya sa iban padulong sa selestiyal nga ginharian sang Dios.

Paagi sa kinabubut-on nga paglakat sa banas sang pag-alagad sa Dios, indi gid kita mangin yara sa posisyon ni Cardinal Wolsey sa ginsulat ni Shakespeare. Nga ginkakasan sing gahum pagkatapos sang iya bug-os-kabuhi nga pag-alagad sa iya hari, masubo sia nga nagbalakhuon:

*Kon gin-alagaran ko lang kuntani ang akon Dios  
bisan katunga*

*Sang pag-alagad ko sa akon hari, indi Niya ako  
pagpabay-an sa akon katigulangon  
Nga hublas sa atubang sang akon mga kaaway.<sup>2</sup>*

Ano nga sahi sang pag-alagad ang ginapangayo sang langit? Ang Ginuo, paagi kay Joseph Smith, nagsiling nga Sia nagapangayo sang tagipusuon kag handa nga pamensaron; kag ang handa kag matinumanon magakaon sang kabuganaan sang duta sang Sion sa sining ulihing mga adlaw.<sup>3</sup>

Nagadulog ako kon akon ginapanumdum ang mga pulong ni Pangulong John Taylor (1808–87): “Kon wala

ninyo ginapabaskog ang inyo mga palangkuan, ang Dios magatudlo sa inyo nga responsible para sinang inyo kontani naluwas kon inyo lamang ginhimo ang inyo tulumanon.”<sup>4</sup>

Kasubong sang isa ka masanag nga suga sang kaa-yuhan amo ang kabuhi ni Jesus sang Sia nag-alagad sa tunga sang katawhan. “Yari ako sa tunga ninyo subong sang nagaalagad,”<sup>5</sup> pahayag ni Jesus samtang Sia naga-hatag sing kusog sa mga tiil sang inutil, panulok sa mga mata sang bulag, palamatin-an sa mga dulungan sang bungol kag kabuhi sa lawas sang patay.

Paagi sa paanggid sang Maayo nga Samariahanon, ang Maestro nagtudlo sa aton nga higugmaon ang aton isigkatawo subong sang aton mga kaugalingon.<sup>6</sup> Paagi sa Iya sabat sa manggaranon, lamharon nga hari, gintudloan Niya kita nga dulaon ang aton kadalok.<sup>7</sup> Paagi sa pagpakaon sang 5,000 [ka tawo], gintudloan Niya kita nga atipanon ang mga panginahanglan sang iban.<sup>8</sup> Kag paagi sa Wali sa Bukid, gintudloan Niya kita nga unahon sa pagpangita ang ginharian sang Dios.<sup>9</sup>

Sa Bag-o nga Kalibutan, ang nabanhaw nga Ginuo nagpahayag, “Inyo nahibal-an ang mga butang nga kinahanglan gid ninyo nga pagahimuon sa akon simbahan; kay ang mga buluhaton nga inyo nakita nga ginahimo ko, ina amo man ang inyo himuon; kay inang inyo nakita nga akon ginahimo, bisan ina man ang inyo himuon.”<sup>10</sup>

Ginabugayan naton ang iban samtang nagaalagad kita sa landong ni “Jesus nga Nazaretnon . . . nga naglibot nga nagahimo sang kaayuhan.”<sup>11</sup> Bugayan kita sang Dios nga masalapuan ang kalipay sa pag-alagad sa aton Amay sa Langit sa aton pag-alagad sa Iya mga kabataan sa duta.

#### MGA TANDA

1. Moses 1:39.
2. William Shakespeare, *King Henry the Eighth*, act 3, scene 2, lines 456–58.
3. Doctrine and Covenants 64:34.
4. *Teachings of Presidents of the Church: John Taylor* (2001), 164.
5. Lucas 22:27.
6. Tan-awa sa Lucas 10:30–37; tan-awa man sa Mateo 22:39.
7. Tan-awa sa Mateo 19:16–24; Marcos 10:17–25; Lucas 18:18–25.
8. Tan-awa sa Mateo 14:15–21; Marcos 6:31–44; Lucas 9:10–17; Juan 6:5–13.
9. Tan-awa sa Mateo 6:33.
10. 3 Nefi 27:21.
11. Mga Binuhatan 10:38.

#### PAGTUDLO GIKA SA SINING MENSAHE

[Ang Ginuo] indi magatugot nga mapaslawan kita kon aton ginahimo ang aton bahin. Iya kita nga pa-baskugon nga labaw pa sangsa aton kaugalingon nga mga talento kag mga abilidad. . . . Amo ina ang isa sa pinakamanami nga eksperiensya nga sarang mag-abot sa isa ka tinuga” (Ezra Taft Benson, sa *Teaching, No Greater Call* [1999], 20). Binagbinaga ang pagpaambit sang isa ka eksperiensya sang ikaw ukon isa mo nga kakilala nakabatyag nga ginpabaskog sang Ginuo ang iya mga talento kag mga abilidad. Agdaha ang panimlay sa pagpaambit sang pila nila ka positibo nga mga eksperiensya sang sila nagsabat sa “panawagan sang Manluluwas nga mag-alagad.”

## LAMHARON

### Pag-alagad sa Templo

Ni Benjamin A.

Sang mag-edad ako 17, nagsugod ako sa pagpamensar sing seryoso parte sa akon palaabuton kag nagpangamuyo ako sa akon Amay nga Langitnon parte sa kon ano ang akon sarang mahimo sa paghanda sa paglakat sa misyon kag pagbaton sang Melchizedek Priesthood. Nabatyagan ko nga dapat ako magkadto sa templo sing mas masunson tungod ini amo ang balay sang Ginuo kag amo ang lugar nga sa diin mahimo ko nga mabatyagan nga pinakamalapit ako sa akon Amay nga Langitnon.

Gani nagpahamtang ako sing lalab-utan nga mahimo sing 1,000 ka bunyag sa isa ka tuig. Matuod-tuod ko gid nga nabatyagan ang kakinahanglan sa pagpahamtang sining lalab-utan; nagpuasa ako agud mahibal-an kon amo gid ini ang nagakadapat ko nga himuon. Ginsabat ako sang aton Amay nga Langitnon, kag nagsugod ako sa pagkadto sa templo sa Tampico, Mexico tagsa ka Sabado.

Sang mahuman ko ang 500 ka bunyag, nagpahamtang ako sang lalab-utan nga magsiyasat sang kasaysayan sang amon kalolohan kag nanamian gid ako kaayo sa akon pagpangsiyasat sa bagay nga indi na ako makatulog tungod sa pagpangita sang mga ngalan. Nakakita ako sing 50 ka mga ngalan kag walo ka henerasyon sang

kasaysayan sang akon panimalay; nagbulig ako sa paghi-kot sang mga buluhaton sa templo para sa ila tanan.

Nakatapos ako sa paghimo sang masobra sa 1,300 ka bunyag kag nag-gradwar ako sa seminary, nagbaton sang Melchizedeck Priethood kag subong nagaalagad na bilang isa ka full-time nga misyonero, nga amo ang isa sa akon pinakadako nga lalab-uton sa kabuhi.

naton palanggaon ang tanan-tanan kag tun-an nga makita kon paano kita makabulig sa ila.

Kon magpanihapon kamo upod ang inyo panimalay, magpanugyan nga ang tagsa ka miyembro sang panimalay magpaambit sang isa ka bagay nga iya ginhimo agud mag-alagad sa isa ka tawo sa sina nga adlaw. Isulat ang imo kaugalingon nga mga eksperiensya sa pag-alagad sa imo journal tagsa ka adlaw.

## MGA KABATAAN

### May Mahimo Ako para sa Iban

**A**ng tagsa sa aton may mahimo para makabulig sa iban. Si Pangulong Monson nagtudlo nga dapat

© 2012 iya sang Intellectual Reserve, Inc. Tanan nga mga kinamatarong ginahuptan. Ginbalhag sa Pilipinas. Petsa sang pagtugot sa Ingles: 6/11. Petsa sang pagtugot sa paglubad: 6/11. Paglubad sang *First Presidency Message, August 2012*. Hiligaynon. 10368 861



# Pag-aksyon sa Tion sang Panginahanglan

Tun-i ining materyal sing mainampuan kag, kon nagakabagay, hambali ini upod sang mga sisters nga inyo ginabisita. Gamita ang mga pamangkot agud buligan kamo sa pagpabakod sang inyo mga sisters kag himiuon ang Relief Society nga aktibo nga babin sang inyo mismo kabuhi.

Bilang mga visiting teachers, isa sang aton mga katuyuan amo ang pagpabakod sang mga pani-malay kag mga puluy-an. Ang mga sisters nga aton ginabisita dapat makasiling, “Kon may mga problema ako, nakahibalo ako nga ang akon mga visiting teachers magabulig sa akon nga indi na kinahanglan nga hambalon pa.” Agud nga maka-alagad, may responsibilidad kita nga mahisayran ang mga panginahanglan sang mga sisters nga aton ginabisita. Kon mangayo kita sing inspirasyon, aton mahibal-an kon paano magsabat sa espiritwal kag temporal nga mga panginahanglan sang tagsa ka sister nga gintakay sa aton nga bisitahan. Dayon, nga nagagamit sang aton tion, mga abilidad, mga talento, mga pangamuyo sang pagtuo, kag espiritwal kag emosyunal nga suporta, sarang kita makabulig hatag sing maluluy-on nga pag-alagad sa mga tinion sang balatian, kamatayon, kag iban pa nga pinasahi nga mga sirkumstansya.<sup>1</sup>

Sa bulig sang mga report gikan sa mga visiting teachers, ang panguluhan sang Relief Society nagakilala sa sinang may mga pinasahi nga mga panginahanglan tungod sang psikal kag emosyunal nga mga

balatian, mga emerhensya, mga pagpanganak, mga kamatayon, kasablagan (sa lawas), pagbatyag sing kapung-aw, ukon iban pa nga mga hangkat. Dayon ang pangulo sang Relief Society nagareport sang iya mga natukiban sa bishop. Sa idalom sang iya pagbulut-an, sia [ang pangulo sang Relief Society] magapatigayon sing bulig.<sup>2</sup>

Bilang mga visiting teachers sarang kita makaangkon sang “dako nga kabangdanan . . . nga magkasadya” bangud sang “bugay nga ginhatac sa aton, nga ginhimo kita nga mga galamiton sa mga kamot sang Dios sa paghuman sining dako nga buluhaton” (Alma 26:1, 3).

## Gikan sa Balaan nga mga Kasulatan

Mateo 22:37–40; Lucas 10:29–37; Alma 26:1–4; Doctrine and Covenants 82:18–19

## Gikan sa Aton Kasaysayan

Sang damlag pa nga mga tinuig sang Simbahan, ang mga miyembro diutay pa lang kag natingob. Ang mga miyembro makaresponde sa gilayon kon may yara sang naga-kinahanglan. Sa karon ang aton mga miyembro masobra na 14 ka milyon kag nagalinapta sa bilog

nga kalibutan. Ang visiting teaching kababin sa plano sang Ginuo agud magpatigayon sing bulig para sa tanan Niya nga mga kabataan.

“Ang nagaisahanon nga sistema nga sarang makahatag sing bulig kag kaumpawan sa kabug-osan sang isa ka simbahan nga tuman kadako sa isa ka kalibutan nga tuman katuhan amo ang paagi sa indibidwal nga mga alagad nga malapit sa mga tawo nga nagakinahanglan,” siling ni Pangulong Henry B. Eyring, Unang Manuglaygay sa Unang Panguluhan.

“. . . Ang tagsa ka bishop kag tagsa ka pangulo sang branch may yara sang isa ka pangulo sang Relief Society nga masandigan,” padayon niya. “May yara sia sing mga visiting teachers, nga nakahibalo sang mga pagtilaw kag mga panginahanglan sang tagsa ka sister. Paagi sa ila, sarang niya mahibal-an ang mga tagipusuon sang mga indibidwal kag mga panimalay. Sarang niya masabat ang mga panginahanglan kag mabuligan ang bishop sa iya panawagan nga atipanon ang mga indibidwal kag mga panimalay.”<sup>3</sup>

## MGA TANDA

1. Tan-awa sa *Handbook 2: Administering the Church* (2010), 9.5.1; 9.6.2.
2. Tan-awa sa *Handbook 2*, 9.6.2.
3. Henry B. Eyring, sa *Daughters in My Kingdom The History and Work of Relief Society* (2011), 110.

### ***Ano ang Sarang Ko Mahimo?***

**1.** Ginagamit ko bala ang akon mga dulot kag mga talento sa pagbugay sa iban?

**2.** Ang mga sisters bala nga akon ginabantayan nakahibalo nga handa ako sa pagbulig sa ila kon kinahanglan nila?

Para sa dugang nga impormasyon,  
mag-log on sa [reliefsociety.lds.org](http://reliefsociety.lds.org).